

全唐诗卷五百三十三

卷 533_1

【金陵怀古】许浑

玉树歌残王气终，景阳兵合戍楼空。
松楸远近千官冢，禾黍高低六代宫。
石燕拂云晴亦雨，江豚吹浪夜还风。
英雄一去豪华尽，唯有青山似洛中。

卷 533_2

【姑苏怀古】许浑

宫馆馀基辍棹过，黍苗无限独悲歌。
荒台麋鹿争新草，空苑凫鹥占浅莎。
吴岫雨来虚槛冷，楚江风急远帆多。
可怜国破忠臣死，日日东流生白波。

卷 533_3

【凌歊台（台在当涂县北，宋高祖所筑）】许浑

宋祖凌高乐未回，三千歌舞宿层台。
湘潭云尽暮山出，巴蜀雪消春水来。
行殿有基荒荠合，寝园无主野棠开。
百年便作万年计，岩畔古碑空绿苔。

卷 533_4

【骊山（一作途经骊山（一作望华清宫感事）】许浑

闻说先皇醉碧桃，日华浮动郁金袍。
风随玉辇笙歌迥，云卷珠帘剑佩高。
凤驾北归山寂寂，龙旗西幸水滔滔。
贵妃没后巡游少，瓦落宫墙见野蒿。

卷 533_5

【咸阳城东楼（一作咸阳城西楼晚眺，一作西门）】许浑

一上高城万里愁，蒹葭杨柳似汀洲。
溪云初起日沈阁，山雨欲来风满楼。
鸟下绿芜秦苑夕，蝉鸣黄叶汉宫秋。
行人莫问当年事，故国东来渭水流。

卷 533_6

【京口闲居寄京洛友人（一作两都亲友）】许浑

吴门烟月昔同游，枫叶芦花并客舟。
聚散有期云北去，浮沈无计水东流。
一尊酒尽青山暮，千里书回碧树秋。
何处相思不相见，凤城龙阙楚江头。

卷 533_7

【冬日登越王台怀归】许浑

月沉高岫宿云开，万里归心独上来。
河畔雪飞扬子宅，海边花盛越王台。
洸分桂岭鱼难过，瘴近衡峰雁却回。
乡信渐稀人渐老，只应频看一枝梅。

卷 533_8

【对雪】许浑

云度龙山暗倚城，先飞淅沥引轻盈。
素娥冉冉拜瑶阙，皓鹤纷纷朝玉京。
阴岭有风梅艳散，寒林无月桂华生。
剡溪一醉十年事，忽忆棹回天未明。

卷 533_9

【送萧处士归缙岭别业】许浑

醉斜乌帽发如丝，曾看仙人一局棋。
宾馆有鱼为客久，乡书无雁到家迟。
缙山住近吹笙庙，湘水行逢鼓瑟祠。
今夜月明何处宿，九疑云尽碧参差。

卷 533_10

【与郑二秀才同舟东下洛中，亲朋送至景云寺】许浑

三十六峰横一川，绿波无路草芊芊。
牛羊晚食铺平地，雕鹗晴飞摩远天。
洛客尽回临水寺，楚人皆逐下江船。
东西未有相逢日，更把繁华共醉眠。

卷 533_11

【长安岁暮】许浑

独望天门倚剑歌，干时无计老关河。
东归万里惭张翰，西上四年羞卞和。
花暗楚城春醉少，月凉秦塞夜愁多。
三山岁岁有人去，唯恐海风生白波。

卷 533_12

【赠茅山高拾遗】许浑

谏猎归来绮季歌，大茅峰影满秋波。
山斋留客扫红叶，野艇送僧披绿莎。
长覆旧图棋势尽，遍添新品药名多。
云中黄鹤日千里，自宿自飞无网罗。

卷 533_13

【李秀才近自涂口迁居新安适枉缄书见宽悲戚因以此答】许浑

远书开罢更依依，晨坐高台竟落晖。
颜巷雪深人已去，庾楼花盛客初归。
东堂望绝迁莺起，南国哀馀候雁飞。
今日劳君犹问讯，一官唯长故山薇。

卷 533_14

【赠萧兵曹先辈】许浑

广陵堤上昔离居，帆转潇湘万里馀。
楚客病时无鵬鸟，越乡归处有鲈鱼。
潮生水郭蒹葭响，雨过山城橘柚疏。
闻说携琴兼载酒，邑人争识马相如。

卷 533_15

【题舒女庙】许浑

山乐来迎去不言，庙前高柳水禽喧。
绮罗无色雨侵帐，珠翠有声风绕幡。
妆镜尚疑山月满，寝屏犹认野花繁。
孤舟梦断行云散，何限离心寄晓猿。

卷 533_16

【姑孰官舍】许浑

草生宫舍似闲居，雪照南窗满素书。
贫后始知为吏拙，病来还喜识人疏。
青云岂有窥梁燕，浊水应无避钓鱼。
不待秋风便归去，紫阳山下是吾庐。

卷 533_17

【凌歊台送韦（一作韩）秀才】许浑

云起高台日未沉，数村残照半岩阴，野蚕成茧桑柘尽，溪鸟引雏蒲稗深。
帆势依依投极浦，钟声杳杳隔前林。
故山迢递故人去，一夜月明千里心。

卷 533_18

【送岭南卢判官罢职归华阴山居】许浑

曾事刘琨雁塞空，十年书剑任飘蓬。
东堂旧屈移山志，南国新留煮海功。
还挂一帆青海上，更开三径碧莲中。
关西旧友如相问，已许沧浪伴钓翁。

卷 533_19

【将度故城湖阻风夜泊永阳戍】许浑

行尽青溪日已蹉，云容山影水嵯峨。
楼前归客怨清梦，楼上美人凝夜歌。
独树高高风势急，平湖渺渺月明多。

终期一艇载樵去，来往使帆凌白波。

卷 533_20

【郑侍御厅玩鹤】许浑

碧天飞舞下晴莎，金阁瑶池绝网罗。
岩响数声风满树，岸移孤影雪凌波。
缙山去远云霄迥，辽海归迟岁月多。
双翅一开千万里，只应栖隐恋乔柯。

卷 533_21

【南亭夜坐，贻开元禅定二道者】许浑

暮暮焚香何处宿，西岩一室映疏藤。
光阴难驻迹如客，寒暑不惊心似僧。
高树有风闻夜磬，远山无月见秋灯。
身闲境静日为乐，若问其馀非我能。

卷 533_22

【朱坡故少保杜公池亭】许浑

杜陵池榭绮城东，孤岛回汀路不穷。
高岫乍疑三峡近，远波初似五湖通。
楸梧叶暗潇潇雨，菱荇花香淡淡风。
还有昔时巢燕在，飞来飞去画堂中。

卷 533_23

【秋日早朝（一作秋日候扇）】许浑

宵衣应待绝更筹，环佩锵锵月下楼。
井转辘轳千树晓，锁开闾阖万山秋。
龙旗尽列趋金殿，雉扇才分见玉旒。
虚戴铁冠无一事，沧江归去老渔舟。

卷 533_24

【沧浪峡】许浑

纓带流尘发半霜，独寻残月下沧浪。
一声溪鸟暗云散，万片野花流水香。
昔日未知方外乐，暮年初信梦中忙。
红虾青鲫紫芹脆，归去不辞来路长。

卷 533_25

【故洛城（一作登故洛阳城）】许浑

禾黍离离半野蒿，昔人城此岂知劳。
水声东去市朝变，山势北来宫殿高。
鸦噪暮云归古堞，雁迷寒雨下空壕。
可怜缙岭登仙子，犹自吹笙醉碧桃。

卷 533_26

【闻释子栖玄欲奉道因寄】许浑

欲求真诀恋禅扃，羽帔方袍尽有情。
仙骨本微灵鹤远，法心潜动毒龙惊。
三山未有偷桃计，四海初传问菊名。
今日劝师师莫惑，长生难学证无生。

卷 533_27

【南海府罢南康阻浅行侣稍稍登陆…主人燕饯至频暮宿东溪】许浑

暗滩水落涨虚沙，滩去秦吴万里赊。
马上折残江北柳，舟中开尽岭南花。
离歌不断如留客，归梦初惊似到家。
山鸟一声人未起，半床春月在天涯。

卷 533_28

【秋晚云阳驿西亭莲池】许浑

心忆莲池秉烛游，叶残花败尚维舟。
烟开翠扇清风晓，水涵红衣白露秋。
神女暂来云易散，仙娥初去月难留。
空怀远道难持赠，醉倚阑干尽日愁。

卷 533_29

【题勤尊师历阳山居】许浑

二十知兵在羽林，中年潜识子房心。
苍鹰出塞胡尘灭，白鹤还乡楚水深。
春坼酒瓶浮药气，晚携棋局带松阴。
鸡笼山上云多处，自斲黄精不可寻。

卷 533_30

【怀旧居】许浑

兵书一篋老无功，故国郊扉在梦中。
藤蔓覆梨张谷暗，草花侵菊庾园空。
朱门迹忝登龙客，白屋心期失马翁。
楚水吴山何处是，北窗残月照屏风。

卷 533_31

【祇命许昌自郊居，移就公馆秋日寄茅山高拾遗】许浑

一笛迎风万叶飞，强携刀笔换荷衣。
潮寒水国秋砧早，月暗山城夜漏希。
岩响远闻樵客过，浦深遥送钓童归。
中年未识从军乐，虚近三茅望少微。

卷 533_32

【伤虞将军（一作伤河东虞押衙）】许浑

白首从军未有名，近将孤剑到江城。
巴童戍久能番语，胡马调多解汉行。
对雪夜穷黄石略，望云秋计黑山程。
可怜身死家犹远，汴水东流无哭声。

卷 533_33

【晚自朝台津至韦隐居郊园】许浑

秋来鳧雁下方塘，系马朝台步夕阳。
村径绕山松叶暗，野门临水稻花香。
云连海气琴书润，风带潮声枕簟凉。
西下磻溪犹万里，可能垂白待文王。

卷 533_34

【寓居开元精舍，酬薛秀才见贻】许浑

知己萧条信陆沉，茂陵扶疾卧西林。
芰荷风起客堂静，松桂月高僧院深。
清露下时伤旅鬓，白云归处寄乡心。
怜君诗句犹相忆，题在空斋夜夜吟。

卷 533_35

【别刘秀才（一作留别裴秀才）】许浑

三献无功玉有瑕，更携书剑客天涯。
孤帆夜别潇湘雨，广陌春期鄠杜花。
灯照水萤千点灭，棹惊滩雁一行斜。
关河万里秋风急，望见乡山不到家。

卷 533_36

【早发天台中岩寺度关岭次天姥岑】许浑

来往天台天姥间，欲求真诀驻衰颜。
星河半落岩前寺，云雾初开岭上关。
丹壑树多风浩浩，碧溪苔浅水潺潺。
可知刘阮逢人处，行尽深山又是山。

卷 533_37

【游钱塘青山李隐居西斋（一作李郢诗）】许浑

小隐西亭为客开，翠萝深处遍苍苔。
林间扫石安棋局，岩下分泉递酒杯。
兰叶露光秋月上，芦花风起夜潮来。
云山绕屋犹嫌浅，欲棹渔舟近钓台。

卷 533_38

【春日郊园戏赠杨嘏评事】许浑

十里蒹葭入薜萝，春风谁许暂鸣珂。

相如渴后狂还减，曼倩归来语更多。
门枕碧溪冰皓耀，槛齐青嶂雪嵯峨。
野桥沽酒茅檐醉，谁羡红楼一曲歌。

卷 533_39

【晚自东郭回留一二游侣】许浑

乡心迢递宦情微，吏散寻幽竟落晖。
林下草腥巢鹭宿，洞前云湿雨龙归。
钟随野艇回孤棹，鼓绝山城掩半扉。
今夜西斋好风月，一瓢春酒莫相违。

卷 533_40

【与郑秀才叔侄会送杨秀才昆仲东归】许浑

书剑功迟白发新，异乡仍送故乡人。
阮公留客竹林晚，田氏到家荆树春。
雪尽塞鸿南翥少，风来胡马北嘶频。
洞庭烟月如终老，谁是长杨谏猎臣。

卷 533_41

【送郭秀才游天台】许浑

云埋阴壑雪凝峰，半壁天台已万重。
人度碧溪疑辍棹，僧归苍岭似闻钟。
暖眠鸂鶒晴滩草，高挂猕猴暮涧松。
曾约共游今独去，赤城西面水溶溶。

卷 533_42

【送张尊师归洞庭】许浑

能琴道士洞庭西，风满归帆路不迷。
对岸水花霜后浅，傍檐山果雨来低。
杉松近晚移茶灶，岩谷初寒盖药畦。
他日相思两行字，无人知处武陵溪。

卷 533_43

【移摄太平寄前李明府】许浑

病移岩邑称闲身，何处风光贵酒频。
溪柳绕门彭泽令，野花连洞武陵人。
娇歌自驻壶中景，艳舞长留海上春。
早晚高台更同醉，绿萝如帐草如茵。

